

20/08/2000

Penduduk percaya kebolehan Dr Khir

SEKINCHAN; Semua lapisan masyarakat di daerah Sabak Bernam khususnya rakyat di Selangor mengalu-alukan pelantikan Ahli Dewan Undangan Negeri (Adun) Sungai Panjang, Dr Mohamad Khir Toyo menerajui pentadbiran Selangor.

Tinjauan Berita Minggu mendapati, mereka berpendapat, Perdana Menteri, Datuk Seri Dr Mahathir Mohamad membuat pilihan yang tepat dan memenuhi kriteria yang dikehendaki rakyat.

Rata-rata mereka berkata, selain mempunyai kelulusan tinggi sebagai seorang doktor pergigian sebagai syarat utama, beliau juga mempunyai daya kepemimpinan yang tinggi, berpengetahuan agama, bersih, bebas skandal dan boleh diterima oleh semua pihak.

Adun Sungai Air Tawar, Mat Yasir Ikhsan, 53, berkata pemilihan beliau memang tepat dan memenuhi segala kriteria yang diperlukan oleh Perdana Menteri selaku Presiden Umno.

Beliau yang mengenali Dr Mohamad Khir sejak sama-sama dilantik menjadi wakil rakyat dalam pilihan raya November tahun lalu berkata, walaupun beliau muda tetapi perawatannya matang.

"Saya yakin dan percaya beliau mampu mentadbir negeri Selangor dengan jayanya dengan sokongan padu semua wakil rakyat serta sokongan padu rakyat Selangor.

"Ditambah pula Pengerusi Badan Perhubungan Negeri yang baru, Tan Sri Muhammad Muhd Taib, adalah bekas Menteri Besar yang berpengalaman luas, disegani dan disenangi semua pihak akan memperkukuhkan lagi perpaduan Umno di negeri ini," katanya kepada Berita Minggu, semalam.

Menurut Mat Yasir, beliau juga akan membantu Dr Mohamad Khir dari segi buah fikiran dan cadangan untuk menangani gejala sosial dan pembangunan kemanusiaan yang perlu ditekankan mulai sekarang.

Bekas Adun Sungai Burung, Datuk Aziz Mohd Desa, 56, berkata pemilihan Dr Mohamad Khir adalah hadiah Perdana Menteri kepada penduduk Sabak Bernam.

"Pelantikan Dr Mohd Khir bertepatan dengan ciri-ciri yang diinginkan oleh rakyat yang mahukan seorang pemimpin yang berkarisma dan bersedia dipimpin.

"Saya yakin beliau mampu menjalankan tugas dengan baik, jujur dan cekap. Soal belum matang dan masih baru tidak timbul kerana ada Menteri Besar sebelum ini dipilih daripada kalangan yang tidak berpengalaman," katanya.

Seorang kontraktor, Ishak Mat Ariff, 37, dari Parit 9 Sungai Panjang berkata, pemilihan beliau amat dialu-alukan dan menepati kehendaki pucuk pimpinan parti.

"Teka-teki selama lebih seminggu ini berakhir semalam (kelmarin) dan Dr Mohamad Khir sudah pun dipilih oleh Perdana Menteri untuk menerajui Selangor.

"Saya sebagai golongan muda merasa bangga atas kepercayaan Dr Mahathir kepada Pemuda dan saya yakin Dr Mohamad Khir bersedia untuk bekerja keras bagi menjayakan Selangor sebagai negeri termaju menjelang 2005," katanya.

(END)